

Zeitschrift:	Lenzburger Neujahrsblätter
Herausgeber:	Ortsbürger-Kulturkommission Lenzburg
Band:	30 (1959)
Artikel:	Zwo Lenzburger Gschichte : Es schneielet, es beielet...
Autor:	Häusermann, Alfred
DOI:	https://doi.org/10.5169/seals-918276

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 14.07.2025

ETH-Bibliothek Zürich, E-Periodica, <https://www.e-periodica.ch>

ZWO LENZBURGER GSCHICHTE

Es schneielet, es beielet . . .

«Großvatti, chumm, mer wänd eis singe!» bättlet schline Züseli a mer ume. Es isch mer aber nid grad ums Singe; vor mer lyt uf em Arbetstisch no en ganzi Bygi Schuelheft, wo sette duregläse sy; do vergoht eim d' Freud am Singe. «Wart no e chly», säg i zum Meiteli, «i bi bald fertig, denn wämmer singe mitenand.» I mache mi vo neuem a d' Arbet, wo sich immer meh i d' Längi zieht, es dunkt mi ämel so. Em Chind wird d' Zyt zlang, es fot a hümbele und sümbele; zletscht höcklet s uf s Ofebänkli und glürlet vor sich äne allerlei Chindeliedli, wo s vo der Muetter glehrt het. Mit em halben Ohr los i nem zue und underdesse fahrt de Rotstift de Zyle no, er isch uf der Fehlerjagd.

Do tönt's mit em fyne Stimcli: «Es schneielet, es beielet, es goht e chüele Wind.» – Und wie n i das ghöre, isch es us mit em Heftkorrigiere; d' Erinnerig übernimmt mi und treit mi furt, wyt zrugg i mi fruehni Jugedzyt:

Es isch amene Sunntig im Vorwinter gsy – i welem Johr chönnt i mit em beschte Wille nümme säge –. De Himmel isch grau über em Land ghanget, mer het nid rächt gwüsst, was er het welle. Es isch grad Wätter gsy für i der Stube z hocke und Trübsal z blose oder der Atti a siner Sunntigrueh z störe, wo n er het welle ha im Chouschteggen inn. DMuetter het abtischet gha und isch no öppis i der Chuchi ume gsurret, me het si ghört mit Gschirr handiere. Denn isch si under d' Türe cho und het mi frei e chly agruret: «He, du, wenn witt du uf e Wäg i d' Sunntigschuel?» – Jä so, d' Sunntigschuel! Mir wär's dasmol ganz rächt gsy, wenn si d' Sunntigschuel vergässe hätt, es wär mer wohl gsy deheim i der Stube; si esch nie so heimelig gsy, we ame Sunntig, wenn de Vatter derzyt gha het, uf der Chouscht obe zgruehe. Denn han i au dörfe an em umefahre – numen e chly, nid zvil – uf der ober Chouschtsitz ue chlädere oder sogar uf de alt Chachelofe, wo breit und massig i d' Stuben use gluegt het mit sine grüene Chachle.

Nu, i ha dänk müeße folge und ha mi uf e Wäg gmacht i d' Sunntigschuel i d' Methodischte-Kapälle a der Ametschwiler Stroß. Worum grad zu de Methodischte? Daß ussert *der* Sunntigschuel no en anderi ggeh het, han i dozmol nonig gwüsst, das han i erscht vil später zufellig erfahre. Es isch guet gsy so, sosch hätti am Änd no gnörzt derwäge, was sicher nüt abtreit hätt bi der Muetter, si het dodure gwüsst, ihre Chopf durezsetze.

Aber a alles das, was i do grad gseit ha, han i a säbem Sunntig sicher kei Gedanke gha, i bi jo nonig emol i dSchuel ggange, han also de Tag eifach gnoh, win er cho isch. – Übrigens isch nid einisch, allerdings schpöter, so um d Zyt ume, won i i der vierte oder feufte Klaß gsy bi, en Methodischte-Prediger z Länzburg gsy, wo Zolliker gheiße het? Und het de nid e ganzi Truppele Meitli gha, Meitli wie Milch und Bluet? Und eis dervo isch glych alt gsy wen i. Allerdings, a Name erinneri mi hüt nümme; es isch doch mängs Johr sithär, daß i di Meitli agstunet ha, di Meitli mit ihrne jugedfrüsc̄e Gsichtere. Nume das weiß i no, daß alli so gspässigi Näm̄e gha händ, s het alles mit -ine ufghört: e Rosine, e Jakobine, e Ruedolfine, e Seline (und derbi händ si doch i der gliche Familie e Jakob und e Ruedi gha). D Rosine isch di Altischt gsy, das weiß i no, und zwor dorum, wil si mir einisch als Vorbild anegstellt worden isch, won i wider emol mit eme Zügnis hei cho bi, wo nid ganz den Erwartige vo der Muetter entsproche het. Und i ha doch gmeint, mini Note dörf i scho zeige, au wenn s nid luter Einer drin heig, wie bi der Rosine. – Im Verschmeukte het sogar es Zweu-bis-drü vüreglüüſſlet, es wird öppe imene mathematische Fach gsy sy; aber i ha s nid z'tragisch gno und ha der Muetter probiert vorzschwäche, so Einer gäb's denn nümme grad i der Bezirksschuel, dZweibisdreier seige ringer überzcho. Aber uf alli Gründ, woni do äneggtagglet ha, het d Muetter nid welle yträtte, au *de* het si nid lo gälte: d Rosine seig halt es Meitli, und de Meitline mache d Lehrer ehner gueti Noten as de Buebe. Do han is gha! Han alli di Einer vo der Rosine Zolliker mitsamt ihre sälber und allne andere «-ine» is Pfäfferland gwünscht. Si sind denn gly drufabe vo Länzburg fortzoge, di hübsche Meitli, wo näbscht dem, daß si hübsch gsy sind, au händ chönne singe wi d Vögel im Hanf.

Jo, wi isch es do witer ggange mit mim Erläbnis? Mir sind i eusne Bänke ghocket und händ öppe wider glost, was is d Anne Büechli, di alt Sunntigschuellehreri, verzellt het. Zwüschenine hani zum Fänschter usgluegt a grau Himmel ue. Und do gsehni, wahrhaftig, wi langsam und fascht fyrlech es Schneeflöckli us em langwylige Gwölch abeschwankt, und denn no eis, no eis, immer meh und dichter. Es schneit! Jetz isch guet! I ha d Anne Büechli und ihri Gschicht, überhaupt di ganz Sunntigschuel vergässe, ha mim Nochber e Stupf ggeh und ihm lyslig i d Ohre gchüschelet:

«Es schnieleet, es beielet,
es goht e chüele Wind;
es früren alli Stüdeli
und alli arme Chind.»

«O, du, das heißtt jo gar nid so», het de mir umeggeh; «das heißtt:

Es schneielet, es beielet,
es goht e chüele Wind;
und eusi Muetter täubelet
und haut mer eis a Grind.»

Und i druf? De neu Täxt het mer jedefalls imponiert, i hane widerholt und gfunde, er seig vil interessanter und rassiger as de, wo mi d Muetter glehrt heig.

Worum eus niemer gstört het ob eusem Tue, weiß i nid, i weiß au nümme, wi de sáb Sunntig es Änd gnoh het.

Am Mäntigmorge druf bin i erscht verwachet, wo jedefalls Vatter und Muetter scho lang am Wärch gsy sind; d Tagheiteri het mer i d Auge zündt und mi hellwach gmacht. Vo ussen ine het de Schnee bländet und i ha mi gfreut uf all di Winterherrlichkeit, wo dusse warti. «Wenn nume d Muetter gli chäm und mer d Wächtigkleider vüregäb!» – Do chunnt mer z Sinn, was i geschter i der Sunntigschuel glehrt gha ha, und halblut han i agfange: «Es schneielet, es beielet, es goht en chüele Wind» – und witer, aber mit der Variation vo der Sunntigschuel am Schluss. Es mueß mi schön tunkt ha, i han ämel szweute Mol vil chächer ighänkt. Wini aber singe: «... und haut mer eis a ...» haglets nume so linggs und rächts um d Ohre ume: «Säubueb du! Wart, i will der! Wer het di das glehrt? Wohär hesch du das?» «He, us der Sunntigschuel!» han i ghület. Ohni daß is gmerkt gha ha, isch d Muetter i d Chamere cho und het di neuste Errungeschafte vo ihrem Buebli ghört. s Sängerhonorar han i grad uszahlt übercho. Das isch schließlig verbi ggange; aber de Täxt, woni i der Sunntigschuel glehrt ha, isch mer blibe, und wenn i das Chindeliedli ghöre, chunnt er mer z Sinn.

Pfylschnell sind die Bilder a mer verbigfloge, i ha d Gägewart ganz vergässe, sogar s Züseli, wo uf mi blanget. Do macht's aber wider en neue Versuech: «Großvatti, bisch nonig fertig? Muesch no vil roti Striche mache?» – «Nei, Chind, i bi fertig für hütt, chumm, mer singen eis, wo d Sophie Haemmerli-Marti d dichtet het!» Denn stimme mer a: «De Früelig, de Früelig, em Winter sis Chind, / de wämmer go taufe, de Götti heiñt Wind; / und d Gotten isch d Sunne, z Nacht badet's im Tau; / und es blümelets Röckli, das git si n em au.»

Mit dem Liedli wär i i Gedanke a d Niederlänzerstroß abe cho, zum Dokterhus, wo au mi lieb Jugendfründ, de Moler Theo Glinz, si früeni Jugedyt verläbt het. Und het nid das Hus euse bsunderig Dank verdienet für die vile schöne Värs, wo drin entstande sind?

ALFRED HÄUSERMANN